



O Volapükaflens Valöpo!

Ven spikobs püki foginik ko mens votik, nom balid binon ad mekön magädi gudik. If mekobs-la magädi negudik, täno no komandobs püki at kemenes obsik. Jenöfo mens osagons: Ekö pük so fikulik, das no kanoy spikön oni! Äsä ya esagob, zeil püka alseimik binon noe ad reidön, penön, suemön oni, abi ad kosädön mudo ko votikans. Nen binets fol at, pük veratik no dabimon. Pük mekavik no binon pläam; bi binon mekavik, binon fasilikum ad gebön. In tef at lecedobsös Volapüki. Ekö pük pereidöl, pepenöl, pesuemöl, ab semikna no gudiko pespiköl. Dod cifik binon, das te nemödikans estudons püki; seko telspikots binons nesuviks, ed if no spikoy Volapüki ko flen votik medü telefon, pöt gönik ad atos no dabimon. Ab dabinson jenöfo mens da vol, kels ya spikons Volapüki. If flüturo orajanoy kolkömi bevünetik ko Volapükaflens, ekö pöt gönikün ad spikön Volapüko ko ods.

Ekö lised brefik, kel oyufon olis ad spikön legudiko püki:

1. Magäd gudik dünön Volapüki vemo. Glidolsös fleni okkonfido, säkolsös ofi/omi lio stadof (stadom), va vigafin äbinon gudik; somo omekobs magädi gönik.
2. Lärmolsös vödis ad bepenön lifi adelik; kanols dünön osi dü del, samo: Lädöb se bed tü düp velid, golob ini banöp, lavob obi, janedob, e ret. Dunolsös osi adeliko jüs okanols bepenön deli lölik okkonfido.
3. Cal e löfäls keblünons mödikosi telspikote. Lärmolsös vödis tefik.
4. Ad fasilükön telspikoti, gebolsös finoti –oy suvo, bi somo no jäfikoy me finots pösodik votik.

Mobs löpik ogudükumons telspikotis olsik. No glömonsös, begö! das kikavöd binon ai : OKKONFID. Laibumolsös oni ed oplöpols nendoto!

Valikosi Gudikün Oles ed Olikanes

Ralph

SE ŽĀNOD NESEVĀDIK YUROPA (FINOT)
(DELS TELDEG IN BYELORUSĀN)
(fa hiel Robert Pontnau)

Fino odajonob brefo lifi bolitik in Byelorusān. Ās in lāns valik lāx-Sovyātāma, lien bolitik no binon kleilik.

Sis yel 1994 presidan binom hiel Aleksander Lukashenko. Pāvālom dū yel 2001 ko pluamanum vemo gretik. Estabom rejimi labū māks nāmātik ōmik, kel zeilon balatami ko Rusān. Suvo magoy omi in vesūdāns as tirenani. Ab lōdanef āvilon vitōn loveikami grobālik katādime lānas nilādik, āsi nenvobi gretik onas. Ab tadun lomānik gretikūn ekōmon de flan febādik, kel riprodon ome nesaidi katādima, skiliko pemigōli ko nestūm gitātas menik. E at ekeblūnon nenvobi mōdikum; jinos, das reiganefs vesūdik nemu sions setādi lātik.

Ab gitātis kinik dalabon-li nenvoban? Too ekō tuūkam nāmik. Stad negudikūn binon ut gasedema, kel tadunon boliti calōfik tata. Too kanob sagōn, das gūā tūp būik, dabinons gaseds somik ōmik, e te ven pubons tataks pōsodik, rejim tōbidon ad neletōn onis, in valem medū monipōn ma lunof ta pōsod veūtik. Te nesuvo, e vemo plāiko, gasedimans riskādikons ad pafanābōpōn. Sekū monipōn, gased tefik muton stōpōn dabūkoti, ab poso opubon dōnu ko tiād votik; seko nepubon dū muls ōmik.

Tadunanef no labon programi vemo kleilikī; migon netāli ko Yurop Pebalōl e lūāl nekleilik lū katādim geton stūti foginānik. Tuvoy nenfikulo gasedis ōmik somik in gasedōps.

Pōped hiela Lukashenko enu elāsikon, dilo kodū latūkam pānsionipelamas. Ottimo glofon pōped Yuropa Pebalōl. Ekō spel klānik reiganefas mōdik Lofūdānas e sifanas. Yurop Pebalōl ogevon ones moni lemōdik, kel odalon tuvedoti sākādas valik; zuo okanoy vobōn in lāns vesūdik liegik, kelas meseds drīmālūkons alani. Ab atos, binon-li vero vobādovik? Konōm anuik takik lānas Yuropik visū lāns vemo neliegiks, kels oflagons leyufi, ojenūkos fūmo tuvedotis lemuik. Ab Byelorusān binon tat smalik, e fūtūr lāna at osekidon fino de nilādans ona, i vesūdiks, i lofūdiks, ka de Byelorusān it.

• • • • • • • • • •



Dūp dagikūn binon ut bū delaprim



DATUVAL – FANÄBÖPAN

II. De solitudine

Vae, solitudo carceris!
Cui lustrantis hic expers:

Tormentum, vae, si carcer est
Ignis lustrantis hic expers:

Heu, quid est purgatorium,
Ubi ignis flammat lustricus!

Flammat profundis foveis,
Atrocis solitudinis!

Respiciens ibi animas
Moerere mitte, cor meum!

O juste multans Tu Deus!
Lustrandis sis propitius!

Meas, en! poenas offero
Desertis pro pauperrimis.

II. Dö soelöf

Levi! Soelöf fanäböpa!
Pro at binon trod nonik.

Levi! If fanäböp binon tom
Is nen fil klinüköl.

Vi, kin binon purgator,
Kö fil klinükamik flamon!

Flamon in kevs dibik
Soelöfa dredabik!

Du logol lanis usik,
Nosikolös glumi, o lad oba!

Ol, o God, kel gudiko pöno!,
Födolös utanis oklinäbikis!

Ekö pönis obik sakrifob
Pro pelüväbs pöfikün.



Redakanapenet:

In psam sonemik balid, Datuval (VV gustula 2008) plakom lifi fanäböpana pö naed balid, e plak somik binon jekäl pro om. Plonom, das utan, kel neai eplakon fanäböpi, no kanom sevön, kin binon lelib. Poso patöbom fa oklied, taan lana. Ab suno dasevom, das tikädöp at binon äs lefog, e su lefog dabinon trodan nämikum, kine legivom lifi oma. Psam telid (löpo) tefon soelöfi, kel töbon vemo kultani, kel äsogom oki kösömiko lä mens mödik. Jekäl votik! Stad dredabik soelöfa mebom ome purgatori - klinüköpi lanas büä juitons leläbi godik. Kisi kanom-li dunön? Sludom ad dasumön utosi, keli lelogom as pöni, e ad lofön oni pro utans, kels i plakons leliedi gretikum ka om.

PÜKS PEDÖNULIFÜKÖL - PÜKS KADÄMÖFIK

(fa hiel John Redgwell)

Ereidob ko nited gretik tradutodi yegeda fa hiel Adrian Pilgrim tefü män. Sekü atos, ebetikob mödo pükis pedönulifüköl. Kludob, das püks somik mutons ai retön as püks telid kludü säks tel sököl:

1. Dünons-li diseinis lifa nutimik?
2. Pük - kis efe binon-lí?

Äsä mäniotom lautan, studans in Mäneän mutons dalabön lenoli gudik Linglänapüka if vilons labön vobi plöpik. Lenol mäna binon, cedü ob, din gudik ma tikädöp kadämik, ab, liedo, no yufon yunanis ad tuvön vobi gudik. In vol nulädik, zesüdos ad spikön püki, keli geboy in feled büsida e teda if viloy plöpön fineno. Kanoy ga juitön pükis pedönulifüköl äsä juitoy, samo, radionaparati yelas 1930-id. If lüükoy one vefadilädi DAB, päridükoy oni. No plu binonöv legik. If nulädükoy püki vönik, jafoy migädi! Betikobsös anu säki telid:

Kis binon-li „pük“? Binon spikamamod pöpa seimik dü timäd seimik. Samo, latin äbinon pük Romänanas. Pos tumyels ävedon pianiko Spanyolapük, Litaliyänapük, e r. Sekü volf laidik, pük vedon pük votik. E binos mögik, das kanoy dönulifükön püki rigädik, e gebön oni dönu. Fovo mögos ad lüükön vödis nulik ad notodön suemodis nulädik, ab no kanoy ceinön gramati, voto pük no plu binon pük rigädik, ab vedon pük nulik.

Geböfiko pük laido cenon. No binon din nemufik! Da tim vöds perons finotis u ceinons fomis oksik. Ceins votik i jenons. Samo in Fransänapük e Litaliyänapük geboy timafomi pekoboplädöl ad notodön dunoti pelölöfüköl balugik. In latin rigik geboy vödi bal, samo: vendidi. Votaflano in Fransänapük geboy : j'ai vendu; in Litaliyänapük : ho venduto (= eselob/äselob). Jinos, das rig geba somik binon värbs depladik latinik, kels fomons timafomis anik somo. Da tim geb at estäänikon jü värbs valik.

If däloy volfi pūkas pedōnulifūkōl, pos tumyels cens gretik ojenons jūs no plu binons pūks rigik, ab pūks nulik. Samo, „mān pedōnulifūkōl” no plu binonōv mān tumyela teldegid, ab pūk so difik leigoās Litaliyānapūk difon de latin Romānanas.

Ekō din veütik: If viloy, das pūk timāda patik blebon nencenik, mutoy nomükōn oni, no demōlo cenis igo smalikis gramata. Gebōfiko, cens, kelis mekon spikanef pūka, padasumons as cens calōfik pos tim ōmik. Ekō sam gudik in Linglānapūk, kiōp no plu sagoy: „If that be the case.” Too in pūk pedōnulifūkōl cens somik mutons blebōn nedāliks.

Pūks pedōnulifūkōl selediko plōpons as pūks aldelik. (Plāam binon hebrey, kel āvedon pūk netik Yisraelāna nutimik). Utans, kels dalārmons onis no sōtons spelōn ad gebōn onis in feled būsida u spikōn onis ko pōp tefik. Samo, if lārnoy māni e tāvoy lū Māneān ad spikōn oni ko jofōrs loatatoodas, ko mens, kels vobons in selidōps, e r. sāspetūkam ostebedon oyi.

Votaflano, stud e geb pūkas pedōnulifūkōl binon lōfāl nitedik. Pūks somik vedons pūks menas labū suemod ot, sevabo: otdialans.



REDAKANAPENET

In yeged at, flen Redgwell penom dō dōnulifūkam pūkas netik. Kūpeds omik tefū volf pūkas binons nitediks, ab sāk veütikūn tefon yumōfi pūka ko menād būik. Tefū mān, yumōf at lōlōfiko pebreikon, kel sinifon ito, das pūk at no plu lifon, ab evedon jenōfo stud kadāmōfik. Otos tefon pūki ela Cornwall (provin kāltik Linglāna). Sekū atos, dōnulifūkam pūka sekidon de dokūms u literat paseta, bi vōnaoloveikod lifik no dabimon. Bī pūk binon balido kosād pespikōl, ekō nebuād sunādik. Sekidoy de buks ad lārnon pūki ya peglōmōli. Binos āsif lārnoy Fransānapūki se tidabuks nen visitōn seimūpo Fransāni! If reidans votik labons tikamagotis tefik ad notodōn tefū sāk patiko nekōsōmik dōnulifūkama pūkas somik, sedolsōs atis obe, begō!

IX:78:2008

FIN TIMA

(fa hiel Frank Roger)

„Tim ekömon anu ad mogolön,” ätikom hiel Roderick.
„Blümob. Fölob zeili nonik ad blibön is. Fin nilikon.”

Äjedom logedi viföfik sui sūt e sui mens, kels ägolons su
pärunaveg, u kels ävabükons toodis okas. Nek äsevon-li utosi,
kelosi ojenon? Ed om, äbinom-li balikan, kel igetom nuni löpao dö
katastrof okömöl?

Lindifos vero. Äbinom bevü privilegans, kels olailifons. No
äbinom gidid oka ad sludön fätoti votikanas.

Änilikom lü jelöp büik, ta tataks keranämetik pestuköl, retäd
„kriga koldik” yelas epasetiköl. Mens ömik idränons omi ad nosükön
oni, bi no plu äfölon zeili. Läbiko no idalilom onis. Jelöp at
blöfonöv anu gebovi oka.

Ädelo ikontrolom providi fidotas ä vata. Id älabom bukemi
gudik us dono, äsi kandelis ä lümätis üfö jenots vero badiks.

Ädoniogolom, äkurbom ditretalitis ed äfärmükom yani.
Äseidom oki su stul bäldik e koveniälik, keli itiom donio ed
äkontrolom rietalinaglokili. If inätäprätom nuni gudiko, öretons nog
düps ömik püda e baitona bü leliv hölalenoida.

Paokalüp! Ibinon in lut. Vero no pisüpädöm ad getön nuni
löpao, das fin tima änilikon. E pätaikedükom ad binön bevü
privilegans, kels ölailifons vali. Äbinon prem demü lif, keli ilifom ma
noms. Isevom ai, das äbinos sapik ad no deikön de veg gidöfik.

Reto äkoslogom nevitovikos. Ästeifülom ad reidön boso, ab
vim no plu ädabinon, seko äslipülom.

Galikölo äkontrolom rietalinaglokili oka ad sevön vio luniko
islipom, ab ätuvom bluvo, das glokil no plu jäfidon. Emutom ceinön
ziöbedemi büä ikömom isio. Mod votik ädabinon-li ad sevön düpi?

IX:79:2008

Atos äbinon veütik, bi imutom sevön tü tim kinik Paokalüp öflapon menäti.

E radion oma! Äsukom oni valöpo, tän ämemom, das äbinon in dom löpo. Ibinom küpälik ad labükön fidi, vati e bukis, ab kodü vif ad dunön valikosi, inedemom dinis votik ömik veütikün.

„Olöpiogolob ad labükön dinis, kelis eglömob,” ätikom. „Spelobsös, das no binos tu latik; das Paokalüp no nog ejenon. Neodob fümiko radioni at. Obinon yüm balik oba ko vol plödik. E telefon polovik oba, no mutob-li sumön id oni?” Neal iplidom paratüli-somik, ab mögos, das ofruton anu.

Ävilom maifükön yani, ab äjinos, das ästegon. Ästeifülom ai dönu nämü gretik oka; päsüadükom, das öyilidon lo sleifs vemöfik oka. Ab pos minuts ömik, haugölo kodü lefen, äyilidom, om it.

„Döbot duton lü ob,” ädasevom. „Emutob nätükön jelöpi at. Ab lio äkanob-li sevön, das öneodob oni ün del seimik?”

Äseidom oki ed äleadom glibön tikamagotis oka. Anu, jenöfo, no äkanom kontagön voli plödik. Ga no äkanom sevön flumi tima ad sevön kisi äjenos plödo.

Äjedom logedi viföfik sui rietalinaglokil dönu. „Stebedolös timüli,” ätikom. „Egetob nuni, das fin tima okömon. Kleiliko äbüocedob, das ötefon Paokalüpi, ab va sinifos-la te, das glokil oba ostopon-li?”

Älemufükom kapi oka ed ädeimom tikamagoti at sunädo. Kikodo getomöv-li nuni löpao dö bos leigo neveütik äs rietalinaglokil oka? Äbinos nesiämik. Ab büocedöl, das nejäfid glokila äbinos-la sümbol bü jenot gretikum-li?

Äkanom datuvön nosi nen lüvön jelöpi, ab no äkanom dunön atosi u kontagön eki plödo ad getön yufi. Äkanom te stebedön ad sevön, va Paokalüp ävuton plödo, u no.

„Ab vero lindifos obe,” äkludom. „Oblibob is jüs ofegebob viktualis oba. Pö jenet alik, obinos fin tima pro ob!”

DIV REGA SALOMON (9)

